

Inatsisartut aalajangiiffisassaattut siunnersuut, Nunat Avannarliit Killiit Siunnersuisoqatigiiffiata inassutigaat Inatsisartut aalajangiissasut Nunat Avannarliit Killiit Siunnersuisoqatigiiffiata inassuteqaataanik nr. 3/2022-imik ilaliillutik.

**Nunat Avannarliit Killiit Siunnersuisoqatigiiffiata Islandimi, Kalaallit Nunaanni Savalimmiunilu suleqatigiinnermut naalakkersuisunut kaammattuutigaa Nunat Avannarliit Killiit aalajangersakkatut kaammattuutaanik nunat malitseqartitsisarnerat pillugu suleqatigiinnermut naalakkersuisut ukiumoortumik nassuiaateqartarnerat siuarsaqqullugu Nunat Avannarliit Killiit Siunnersuisoqatigiiffiannut ataatsimut allakkatigut nassuiaateqartarnermut suleqatigiinnermut naalakkersuisut parlakaajaallutik aqutsisuusarnerisigut.**  
(Aallartitat siulittaasuat Kim Kielsen)

### **Akissuteqaat**

(Inuutissarsiornermut, Niuernermut, Aatsitassanut, Inatsisit Atuutsinneqarnerannut, Naligiissitaanermullu Naalakkersuisoq)

Naalakkersuisut aallartitat siulittaasuat qutsavigaat siunnersuutaasoq pillugu, apeqqummik pingaaruteqartumik oqallisaasumillu saqqummiineranik.

Piffissami sivisuumi anguniagaavoq takornariartitsinerup nunatsinni aningaasarsiorbitsinni sukarsuit pingaarnerit ilagilerumaaraat. Tamannalu tunngavigalugu nunatsinni annertuunik aningaasaliisarnernik ingerlatsivugut attaveqaasersuuteqarnitsinnut, tikeraat qitiusunik ornittagaannik pilersitsiortornernut, ilinniartititsinernik suliniuteqarnitsigut aammalu namminersortut suliffiutillit takornariartitsinikkut ineriartortitsinissaannut. Naallu nappaassuarmit piffissami aqqusaarneqarfigisatsinni takornartititsineq ajornartorsiornerartumik inissisimasimaluortoq takornariartartut annertuumik amerliartuuteqarnerat ingerlaqqilersimavoq.

Taamaakkaluortoq takornariartitsisarneq aamma apeqqutinik pingaaruteqartunik pilersitsivoq, piujuaannartitsinermut tunngasutigut, inuussutissarsiutinik allanik peqateqarnermut atasutigut, takornariartartut siammasinnerusumik ornittagaqartinniarnernannut inuiaqatigiinnullu aningaasatigut isaatitsinikkut, aammalu nunatsinni pinngortitamik kulturitsinnilu naleqartitatsinnik illersuineq eqqarsaatigalugit.

Pingaaruteqarpoq takornariartitsinermik ataatsimut pissutsinik isiginnittumik takunnissinnaanissarput, taamaattumillu Inatsisartut, kommunalbestyrelsit, kattuffiit, innuttaasut inuussutissarsiortullu ujartorsimavaat takornariartitsineq pillugu ilisimasat annertunersut, suliassaqarfimmilu periusissiamik peqarneq. Naalakkersuisut sammisat pillugit naalaarsimapput, tamatumunngalu atatillugu suliassat ingerlallugit.

Naalakkersuisut maanna inaarsarpaat takornariartitsineq pillugu nassuiaasiaq siorna Inatsisartunut suliarineqartussat aalajangiunneqartoq. Tassani atuarneqarsinnaassaaq paasissutissat amigaatigineqartut, tunngaviusunik ilisimasassat takornariat qanoq amerlassuseqarneranni, nunanit

sorlernit aallaaveqartarnerannut inuiaqatigiinnullu aningaasat qanoq amerlatigisut iluaqutinngortartut eqqarsaatigalugit, kiisalu aamma takornariat nunatsinni sumiiffinnut amerlanerusunut siammartitsertarnerinut itinerusunik paasissutissat. Naalakkersuisut aamma inaarsaleruttorpaat sivisuumik utaqqineqalersoq takornariartitsinermi ikaarsaariarnermut periusissiasaq, ukiup tulliuuttup naanissaata tungaanut ungasinnerusumut atuuttumik periusissiaqalernissaata tungaanut atuuttusaaq. Tamatumalu saniatigut Naalakkersuisut aamma suliaaraat umiarsuarnut takornariartaatinut ilaallutik takornariartartut aqunneqarnerannut maleruagassassanut missingersuusaaq. Taamaasilluni piffissami matumani nassuiaasiat aamma periusissiat sisamat suliarineqarput, taakkunanilu pingasut ukiaq manna tamanut saqqummiunneqassallutik.

Kalaallit Nunaata nunat tamalaat akornanni misigisassarsiorlutik takornariartarfittut ilisimaneqalersinneratigut pinngortitamik avatangiisinillu illersuinerit tullerriaarisarnermi pingaaruteqaannangillat, kisiannili tunngaviusutut aallaaviullutik nunatsinnut takornariartitsisarnerup siunissaqarnissaanut. Pisariaqarpoq qularnaassallugu pinngortitamut namminermut sumiiffinnullu inoqarfiusunut angalasarnerup pitsaanerusumik aqunneqarnissaat. Pisariaqarporlu inuussutissarsiutit sinnerinut allanut pitsaasumik peqateqartuarnissap aaqqissuulluagaanissaa, tamatumani aamma piniarnermut aalisarnermullu inuussutissarsiutit eqqarsaatigalugit. Aamma sillimaniarnermut tunngasunik isummersorfissaqarpoq, tamannami ersarissilluinnarpoq ungasinngitsukkut nunatta kangiata avannaani Alpefjord-imi pisoq eqqarsaatigalugu.

Takornariartitsinikkut suliassaqarfimmi aaqqissuulluagaasumik nunani avannarlerni killerni suleqateqarnermik ingerlatsererpugut, ataatsimoorussanik ussassaarisarnertigut nunat avannarliit killiit ingerlatsiviinik, aammalu attaveqatigiinnitsigut kattuffitsigullu. Naalakkersuisut kissaatigaat nunat avannarlerni killerni nunat ingerlatsivigisaat akimorlugit periusissialiortarnikkut pinngortitamilu takornariartitsisarnermut tunngasutigut suleqatigiinneq, siunnersuutigiumallugulu tamanna oqaloqatigiittarnertigut ingerlatsissagipput.

Qulaajaalluni nalunaarusiortarnerit piffissamik pisariaqartitatsinnik aaqqissuussinermit nunatsinni atukkatsinnik tigusivallaarsinnaavoq. Taamaattoq Naalakkersuisut erseqqissarumavaat maannangaaq nunanut avannarlernut killernut sammisumik nunani ilisimasat misilittakkallu eqqarsaatigalugit ingerlatsigatta.

Qulaajaalluni nalunaarusiortarnerit Inatsisartunit kissaatigineqassappat Naalakkersuisut sanassavaat. Naalakkersuisut qulaajaalluni nalunaarusiortarnissamut qularisaqarpoq suleqatigiinnermut ingerlareersumut nutaanik nassaartoqassasoq. Taamaattumik Naalakkersuisut inassutiginiangilaat siunnersuut itigartinneqassasoq akuerineqassanersorluunniit.